


SenVensan 9 avril 2021 : Lè volkan LaSoufriyè koumansé pété



Dépi plizyè mwa, syantifik ki ka véyé volkan koumansé véyé La Soufriyè SenVensan. An boul lav solid té za ka fèt adan bouch volkan-an. Plizyè tranbmandtè koumansé soukwé volkan-an an fen mwa mars. Lè 5 avril, Latè-a koumansé tranblé dèplizanpli fò, kilédi ki magma-a té ka koumansé monté èk pasé anba latè.

Lè boul lav solid-la fann, lav rouj koumansé parèt é koumansé vréyé gaz cho monté. Magma-a té za ka koumansé monté é té ka soukwé latè-a pli fò. 8 avril 2021, Misyé Ralph Golsalves, Prèmyé Minis SenVensan mandé sé moun la koumansé sòti oliwon volkan-an.


Esplozyon LaSoufriyè

Vendrèdi 9 avril 2021, LaSoufriyè SenVensan koumansé pété bonnè bon maten. An gwo blo fèt é vréyé anlo gaz cho épi wòch èk sann adan'y, lèvé jis 10 kilomèt wotè.



Volkan LaSoufriyè sé an volkan péléyen kilédi i ka pété épi gaz cho épi wòch kon Montann Pelé. Lè i ka pété, an gwo niyaj gaz cho ka déboulé silon sans bouch volkan-an. Kon magma-la épé, i pa ka koulé flo, é sé dé gwo blok wòch i ka voyé monté. Lavalas sann, gaz cho épi wòch ka déboulé anlè kan volkan-an. Ti lafimenn ka sòti bò volkan-an, la ki ni dlo anba tè. Lavalas labou, sann épi wòch pé glisé désann anlè kan volkan-an. Plizyè blo pé fèt pandan plizyè simenn é vréyé anlo sann an syèl-la. Sé van-an ka chayé sann épi ti wòch alé jis anlè sé lilèt-la ki oliwon SenVensan. Silon sans é fòs van-an ka

souflé, sann la pé ritonbé anlè Bawbad, Sent-Lisi, oben Matnik. Adan niyaj ki ka fèt alantou volkan-an, sé ti-goutdlo niyaj-la pé ni lasid adan yo ki, lè yo ka vini grenn lapli, ka ritonbé anlè latè.



Pokosyon pou pran épi sann volkan-an

Oliwon volkan-an, sé sann-lan cho. Yo ka frédi ofiyamizi yo ka vwayajé. Sann volkan sé finin pousyè wòch ki pé rantré an zyé é an nen moun ki ka touvé yo la yo ka tonbé. Yo pé grafiyen é brilé lapo, lè yo ni lasid andidan yo.

Moun ki ni lazm, moun ki ka mété lanti-kontak, ti-manmay ki ka jwé déwò, moun ki frajil an poumon, sé sé tala ki ni pou pran plis pokosyon. Mété linèt, pwotéjé nen épi bouch épi mas oben twèl mouyé, pé baré sann-lan èk anpéché yo rantré adan sé poumon-an.

Larivyè, dlo lasous, dlo an sitèn, tout dlo ki ni sann adan yo, pa bon pou bwè. Zannimo ki ka manjé zèb pé toufé épi sann ki tonbé anlè sé fèy-la.

Avan balayé sé sann lan, fòk mouyé yo ti-bwen pou yo pa voltijé an lè. Mouyé twa sé kay-la avan tiré sann-lan tou, men pa twòp. Lè anpil sann tonbé anlè twa-a, pwa sann-lan pé rivé krazé yo.